

Date : 11 Jun 2017
Title : Kematian Zulfarhan: 4 pelajar Uniten dibebas
Publication : Utusan Malaysia
Page : 19

Kematian Zulfarhan: 4 pelajar Uniten dibebas

KUALA LUMPUR 10 Jun - Empat pelajar Universiti Tenaga Nasional (Uniten) yang dibebaskan semalam setelah ditahan pihak polis bagi membantu siasatan kes kematian Pegawai Kadet Laut, Zulfarhan Osman Zulkarnain, akan kembali memulakan pengajian mereka pada minggu depan.

Pejabat Naib Canselor Uniten dalam satu kenyataan memaklumkan keempat-empat pelajar itu selamat dibawa pulang oleh keluarga masing-masing dan akan mengikuti kuliah seperti biasa pada minggu depan.

Jelas kenyataan itu, Pusat Hal Ehwal Pelajar (PHEP) Uniten menegaskan, universiti berkenaan akan memberi sokongan dan kerjasama sepenuhnya bagi memastikan pelajar-pelajar tersebut dapat menjalani kehidupan di kampus seperti biasa.

"Dengan rasa penuh kesyukuran, pihak pengurusan Uniten memaklumkan empat pelajar yang ditahan bagi membantu penyiasatan berhubung kes kematian seorang pelajar Universiti Pertahanan Nasional Malaysia (UPNM) telah dibebaskan.

"Malah, Polis Diraja Malaysia (PDRM) telah menjelaskan

keempat-empat pelajar terbabit tidak terlibat di dalam kes tersebut sama ada secara langsung mahupun tidak langsung," jelas kenyataan yang dikeluarkan semalam.

Keempat-empat pelajar Uniten itu ditahan bersama-sama 32 penuntut UPNM bagi membantu siasatan kes kematian Zulfarhan Osman, pelajar jurusan kejuruteraan elektrik UPNM yang meninggal dunia di Hospital Serdang kira-kira pukul 10 malam, 1 Jun lalu dengan kesan lebam dan melecur pada badan dipercayai didera dengan seterika wap.

Menurut kenyataan itu, pihak Uniten juga ingin mengucapkan terima kasih kepada mereka yang sentiasa memberi sokongan moral serta mendoakan kesejahteraan pelajar-pelajar yang terbabit.

"Kami amat bersedih di atas kejadian yang menimpa Zulfarhan Osman. Seluruh warga Uniten mendoakan agar Allah SWT mencucuri Rahmat-Nya ke atas roh Allahyarham dan turut mendoakan agar keluarga Allahyarham bersabar dan diberikan kekuatan dalam menghadapi saat-saat yang sukar ini," tegas kenyataan itu.